

1. UVOD

Opšta namjera, od koje sam pošla pri obradi i realizaciji ove teme, bila je u tome da se, što se tiče sadržine, obrade zajedno svi najvažniji segmenti prava vlasništva u našem pravnom sistemu, te da se što se tiče metoda, ta obrada izvrši prije svega sa stanovišta njegove što pogodnije i jednostavnije razumljivosti.

Takve polazne pozicije i nastojanja mogle bi ovaj rad opravdati i učiniti korisnim za brojne i razne potrebe, naročito onih koji se bave ovim naučnim disciplinama, pa i meni samoj u mom budućem radu u građanskopravnoj oblasti.

Pitanja koja se obrađuju u ovom radu prikazana su u cjelini, dakle sa svim odgovarajućim zakonskim i drugim propisima odnosno pravilima, sa težištem na najvažnije institute, putem kojih se regulišu pozicije, prava i obaveze učesnika u njima.

Pri tome su ti instituti i odredbe komentarisani, objašnjavani, međusobno povezani. Dakle, ne radi se ni o samom zakonskom tekstu, ni samo o uobičajenim komentarima njegovim, ni samo o objašnjenjima kakva se obično daju uz zakonske tekstove, već, u stvari, o svemu tome ujedno.

Težila sam da sa takvom obradom postupaka, zasnovanom na autentičnom zakonskom tekstu, prije svega omogućim da se lako, brzo, pregledno, čak i bez posebnog stručnog znanja, može snaći svako onaj ko čita ovaj rad, te da nađu ono što ih interesuje, da znaju kako da regulišu svoje obaveze i ostvare svoja prava.

Već sami naslovi i podnaslovi mogu poslužiti u svakodnevnom inače sve složenijem pravnom saobraćaju, ali isto tako u njemu se može bez poteškoća snaći stručnjak, pravna i druga odgovarajuća društvena institucija, kojima jedan ovakav rad, nadam se, može biti potreban i koristan.

Moglo bi se ujedno reći i to da su osnovne teškoće pripremanja ovog rada bile tranzicijsko vrijeme u kojem živimo, kada još uvijek postoji izvjesna prelazna situacija, s obzirom na ustavno-pravnu uređenost Bosne i Hercegovine.

Polazeći od svih navedenih činjenica, ovaj rad podijeljen je u 6 cjelina:

- Uvod;
- pravo vlasništva;
- sticanje prava vlasništva;
- zaštita prava vlasništva;
- prestanak prava vlasništva i
- zaključak rada.